

四庫全書

史部

欽定四庫全書

史部

畿輔通志卷一百十九

二十九

詳校官監察御史_臣劉夔

檢討_臣德生覆勘

總校官進士_臣繆琪

校對官中書_臣牛稔文

謄錄監生_臣范廷驊

欽定四庫全書

畿輔通志卷一百十九

詩 五言律

唐

送臨津房少府

楊炯

岐路三秋別江津萬里長烟霞駐征蓋絃管促飛觴
階樹含斜日池風泛早涼贈言未終竟流涕急霑裳
送鄭少府入遼共賦俠客遠從戎 駱賓王

邊烽警榆塞俠客度桑乾
柳葉開銀鏑桃花照玉鞍
滿月臨弓影連星入劍端
不學燕丹客空歌易水寒

送崔融東征

陳子昂

金天方肅殺白露始專征
王師非樂戰之子慎佳兵
海氣侵南部邊風掃北平
莫賣盧龍塞歸邀麟閣名

秋夜宴臨津鄭明府宅

杜審言

行止皆無地招尋獨有君
酒中堪累月身外即浮雲
霜白宵鐘徹風清曉漏聞
坐携餘興往猶似未離羣

異鄉寥落處杯酒喜逢君共對秋宵月誰吟日暮雲
竹深雲影度川靜鴈聲聞且盡樽前樂明朝又索羣

送崔融東征

杜審言

君王行出將書記遠從征祖帳連河闕軍麾動洛城
旌旗朝朔氣笳吹夜邊聲坐覺烟塵掃秋風古北平
樂城白鶴寺

沈佺期

碧海開龍藏青雲起鴈堂潮聲迎法鼓雨氣濕天香
樹接前山暗溪承瀑布涼無言頌居遠清淨空天王

別馮判官

高適

碣石遼西地，漁陽薊北天。
關山唯一道，雨雪盡三邊。
才子方為客，將軍正渴賢。
遙知幕府下，書記日翩翩。
奉使入居庸

高適

匹馬行將夕，征途去轉難。
不知邊地別，祇訝客衣單。
溪冷泉聲苦，山空木葉乾。
莫言關塞極，雨雪尚漫漫。
自薊北歸

高適

驅馬朔門北，北風遶馬哀。
蒼茫遼遠口，豁達胡天開。

五將已深入前車止半回誰憐不得意長鋏獨歸來

送樂城張子容

孟浩然

夕曛山照滅送客出柴門惆悵野中別殷勤醉後言
茂林子偃息喬木爾飛翻無使谷風誚湏令友道存
贈臨洺縣令皓弟

李白

陶令去彭澤茫然太古心大音自成曲但奏無絃琴
釣水路非遠連鰲意何深終期龍伯國與爾相招尋

暮過山邨

賈島

數里聞寒水山家少四鄰怪禽啼曠野落日恐行人
初月未終夕邊烽不過秦蕭條桑柘外烟火漸相親

暮過本巖寺

賈島

巖岫聳寒色精廬向此分流星透疎木走月逆行雲
絕頂人來少高松鶴不羣一僧年八十世事未曾聞

薊北旅思

張籍

日日望鄉國空歌白苧詞長因送人處憶得別家時
失意還獨語多愁祇自知客亭門外柳折盡向南枝

薊北春愁

張籍

渺渺水雲外別來音信稀
因逢過江使却寄在家衣
問路更愁遠逢人空說歸
今朝薊城北又見塞鴻飛

經廢寶慶寺

司空曙

黃葉前朝寺無僧寒殿開
池晴龜出曝松暝鶴飛回
古砌碑橫草陰廊畫雜苔
禪宮亦銷歇塵世轉堪哀

安州道中經漣水有懷

劉長卿

征途逢漣水忽似到秦川
借問朝天處猶看落日邊

映沙晴漾漾出碇夜濺濺欲寄西歸恨微波不可傳

過賈島故居

姚合

杳杳黃泉下嗟君向北行有名傳後世無子過今生
新墓松三尺空階月二更從今舊詩卷人覓寫應爭

清河與趙氏昆季燕集

李商隱

勝概殊江右佳名逼渭川虹收青嶂雨鳥沒夕陽天
客鬢行如此滄江坐渺然此中真得地漂蕩釣魚船

過賈島墓

李洞

一第人皆得先生豈不銷位卑終蜀士詩絕占唐朝
旅葬新墳小魂歸故國遙我來因奠酒立石用為標

哭賈島

李蘋

秦樓吹昔夜南望只悲君一官終遐徼千山隔旅墳
恨聲流蜀魄清夢入湘雲無限風騷句時來日不聞
晚泊無棣溝

劉長卿

無棣何年邑長城作楚關河通星宿海雲近馬容山
僧寺白雲外人家綠渚間晚來潮正滿處處落帆還

送呂郎中赴滄州

僧無可

出守滄州去西風送旆旌路遙經幾郡地盡到孤城
拜廟千山綠登樓遍海清何人共東望日向積濤生

栢巖寺

栢巖禪師

野寺絕依念空山會遍行老來披衲重病起讀經生
乞食嫌村遠尋溪愛路平多年栢巖住不記栢巖名
宋

送李閣使知冀州

梅堯臣

駸裏黃金絡春風北渡河將軍守漢法壯士發燕歌
綠水塘蒲短晴天塞鴈多家聲復年少矍鑠笑廉頗
送聶之美任鷄澤令

司馬光

趙魏高氣俠到今風俗然推埋吏難禁擊斷世稱賢
明府宜更斐罷民庶息肩無如繭絲者急斂縱敲鞭
將次洛州憩漳上

王安石

漠漠春風裏茸茸綠未齊平田鴉散啄深樹馬迎嘶
地入河流曲天隨日去低高城已在眼聊復解輕齋

桃花山

趙師秀

舊有桃花樹桃花寺故云石幽秋鷺上灘遠夜僧聞
汲水連黃葉登高散白雲燒丹勾漏令無處不逢君

哭文山

謝翱

總戎臨北粵花鳥瘴江村落日失滄海寒風上薊門
雨青餘化血林黑見歸魂欲哭山陽笛隣人亦不存
金

過居庸關

鄭掖

奔峭從天折懸流赴壑清路回穿石細崖裂與藤爭
花已從南發人今又北行節旄都落盡奔走愧生平

峭帆亭

張 斛

高秋客未還何處望鄉關喬宇踈烟外孤亭落照間
雨晴山覺近湖滿水如間腸斷峒陽路歸雲不可攀

信都送李嘉甫

呂中孚

溪水碧於草溪邊送客行寫詩傳別意把酒聽歌聲
去路青天遠歸心白羽輕尊前折楊柳一一離情

過良鄉縣學

趙 沨

儒宮宜地僻竟日有餘清殿古碑仍在庭空草自生
風高時脫木雲重欲摧城客興已瀟灑秋堂更雨聲
元

晚上易臺

劉 因

遺臺連廢壘落日展遙岑海嶺天東北燕遼世古今
每當多感慨直欲罷登臨莫更留塵跡千年不易禁

登武陽

劉 因

朝遊樊子館晚上武陽城潮接滄溟近山從碣石生
斷虹雲淡白返照雨疎明且莫悲吟發樵歌已愴情

滿城道中

劉因

學館三年夢西山此日行人生兩屐足世累一簑輕
別澗水流合斷林烟補平誰能分半壑相與結巘耕
渡滹沱河

劉因

遙臨滹水岸回首土門關秋色巉巘上川形拱抱間
分疆人自隘設險地誰慳欲問前朝渡江鷗故意閒

海子橋

馬祖常

朝馬秋塵急天橫曉鏡舒野圓雲度鳥波靜藻依魚
石棧通星漢銀河落水渠無人洗寒露為我媚芙蕖

上都道中

柳貫

出塞行瞻日趨朝喜近天離宮開苑囿馳道絕風烟
瑤水巡非遠峒山歷更綿甘泉多法從獻賦憶當年
幃殿層雲障轅門積雪峰奇鷹皆戴角御馬盡飛龍
瀚海將臨幸雲亭望陟封青丘大羽獵有事待深冬

公子青絲轡王孫綠幘車宴酣風小定舞破日西斜
手擲宮中菓神行海上槎築郿無自厚儉德不宜奢
題清風樓

薩都拉

晉代繁華地如今有此樓暮雲連海岱明月滿滄州
歸鳥經林過飛星拂瓦流城南秋欲盡寂寞採蓮舟

光武廟

陳孚

赤伏符天子元圭袞藻明千秋鄴邑廟一笑下江兵
野濶騰龍氣河流渡鳥聲列侯冠劍合英彩儼如生

明

過滹沱河

金幼孜

前驅聞警蹕傳道近滹沱凍合含初日風微動碧波
人從仙仗出路自畫橋過北望幽燕外青山疊疊多
謁陵遇雨

李東陽

勝國遺蹤遠荒城舊築存堞雲隨鳥盡壕雨帶沙渾
塞馬空南牧宵車竟北奔中原今一統佳氣繞乾坤

駕幸南海子

何景明

鏡音發桂時春狩踐蘭區水盡緹城合山迴帳殿孤
公卿隨八駿虎旅備三驅如聞後車載倘遇渭川夫
高橋題河西道壁

馬中錫

寒垣風景異況屬杪秋時野濶行人少沙深馬去遲
狂飈鳴獨樹寒燒入荒陂試問晨征者憂來鬢幾絲
瓠子

李夢陽

沈壁飲瓠子橫汾懷帝歌波濤滿眼送城郭沒年多
虎戰仍三晉龍遊失九河宋人饒事蹟今望亦滂沱

劉諫議祠

鄭善夫

今古悲歌地劉生有墓祠
祇餘經世志況值諱言時
去國英雄盡還山事業遲
黃金舊臺北搔首動遐思

成安道中

周在

斜日急征驄烟村杳靄中
草枯狐穴出樹禿鳥巢空
陰壑明殘雪驚塵暗黑風
神京回首是何必哭途窮

遊通惠河

徐階

頗憶三江遠源流意若何
水深秋氣切竹密雨聲多

熟巢當尊落飛塵旋堞過柳陰催繫纜細聽桔槔歌

甕山耶律祠

劉效祖

迢遞荒山下披榛拜古祠衣冠猶異代歲月已清時
溪遠泉聲細林深日影遲黃沙空朔漠誰與問殘碑

謁陵

穆文熙

迢遞長陵路川原入夕暉桃花臨水岸松子落人衣
樹古虬龍遍林深鳥雀稀御碑留翰藻讀罷自依依

橫翠樓

黎民表

高樓當絕塞春望轉氤氲百戰全燕地千重大漠雲
控弦無塞馬飲羽憶將軍老去親戎馬悲笳向夕聞
來青軒

徐渭

畫棟將雲繞修檐傍漢開亭非邀翠入山自送青來
遠色虛難寫遐觀縱未迴共言春景麗不見使人猜
送人之易州

李三才

同心日以少無那復君行匹馬一相送秋風萬里生
燕山還黛色易水自邊聲落日河梁晚悠悠見去旌

山人宋鵝池蹈海

邢侗

僑寓江陵日徐陵作
那年重來滄海上
依舊孝廉船
醉齒松枝雪狂吟
桂樹篇浮生無住
著駘蕩白雲天

釣魚臺

馮琦

是處堪垂釣誰家長
閉關榭多偏近水
雲薄更宜山
鳥語扶疎裏人踪
杳靄間日斜仍策
馬太息野鷗閒

定州曉行

魏允中

向曉戒征夫駕言歸
故都敝貂蒙霧濕
遠鴈入雲孤

踪跡他鄉滿音書弱弟無步兵別有淚不獨為窮塗
過米仲詔勺園

葉向高

幽築藕花間荆扉日日閒竹多宜作徑松老恰成關
堤繞青嵐護廊回碧水環高樓明月夜莞爾對西山

高梁橋

顧起元

路轉柳橋曲河連杏渚長半天分樹色匝地起花香
望入朱樓隱行宜翠幃張何期帝城畔咫尺到滄浪
紅樹人家滿春風載酒時揚鞭稍露葉欹帽拂天絲

吹沫魚兒小搏花燕子癡青郊多景色偏喜日遲遲
步屨綠楊郊東風雪乍消眼因僧寺豁心逐酒帘飄
十里藏鶯樹一灣走馬橋誰能在朝市偃仰過花朝

遊白石莊

劉滢嗣

野圃宜秋色蒼蒼況夕曛松青新沐雨槐古直搔雲
竹牖池光合石樓山翠分風前歌管細吹向月中聞
晚歸聖全寺

宋登春

月淨花林僻琴清竹院閒幽蘭芳短砌獨鶴下空山

鳥道排雲入松門映雪關兒童夜歸去採得紫芝還
集淨業寺水次再過十方庵看荷花因宿其中

鍾惺

如此匆匆際禪棲肯再來曾無三日隔又見數花開
童負桃笙至僧籠菜甲回出門拚一宿無復後人催
每憶經行處重游勝昔游往來能漸熟耳目自多幽
水氣窮昏旦林聲閱夏秋晚花不無意客散獨相留
客盧龍代諸將寄京洛相知
阮自華

朔氣厲高秋將軍洗髑髏勞雲出家暗疲馬傍人愁
風色侵重鎧霜威折大矛貴人能作賦何不自封侯

盡節遺詩

范景文

孤臣空灑泪天步遂如斯妖蝕三光暗心盟九廟知
翠華迷草露淮水漲烟澌故國千年恨忠魂遠玉墀

宣府畧書所見

曹心簡

地據中原盡天垂大漠荒雲多終日白草不待秋黃
任水稀魚鱗衝途但馬羊自憐年四十今始歷茲方

驅車纔入郭，突兀俗風新。
比屋粧筒瓦，中元餉麵人。
事因前代舊，業自近時貧。
莫漫愁彫瘵，生全在大臣。
本朝

盤山

宋 權

山水何奇絕，高秋快此行。
千層盤路轉，萬壑暗泉爭。
天外懸松影，雲根度馬聲。
更憐紅樹色，遠近向人明。
冷嘴頭邊城眺望

李 霽

古堞連峰峻，憑高騁望時。
水從絕塞入，天接四山垂。

往事殘碑識邊愁老卒知烽烟猶未熄設險憶坤維
獲鹿道中過淮陰侯祠

魏裔介

舍人書不載告變豈無欺赤族酬隆準扁舟愧子皮
奇兵吞趙魏古屋泣熊羆呂雉誠多詐空令漂母悲
過新樂觀伏羲臺浴兒池

魏裔介

萬古真元氣獨鍾至聖身龍圖開道奧鳥跡佑斯人
野色空池綠荒臺晚樹春遺經有卦象俯仰盡經綸

井陘

申涵光

嗚咽城邊水猶疑戰士魂
韓祠何日始孤碣至今存
車馬迷山霧牛羊入縣門
一燈茅店裏懷古向誰論
寄懷孫鐘元先生蘓門
申涵光

結屋依泉樹鬚眉見古人
衰年仍向學薄俗自相親
萬死無鉤黨孤忠有逸民
近村成井邑半是舊比鄰
東五峰
宋琬

已謂西峰好東峰更不羣
懸崖疑削刃古木善藏雲
海色朝來變泉聲雨後分
何年此高卧自剪薜蘿裙

楊志祖見詒忠愍手蹟感賦

杜越

搦得平原帖行間暈日星丹楓留草疏翠竹失蘭亭
筆想拳應握書知恨不清文孫存氣骨脫贈意惺惺

董子祠

朱彝尊

漢日江都相荒祠舊水濱玉杯存俎豆青簡重天人
夕鳥窺園下秋花裊露新淒涼不遇賦千載一沾巾

石景山

程可則

石景鬱嵯峨千巖窈窕過日中餘霧氣樹裏見渾河

鮮綠殘碑在燈青古佛多上方笙磬晚隨意下雲蘿

次欒城

周體觀

久客忘留滯長歌發興賒春風飛海燕虛館放山花
馬渡垂楊緩巾隨落日斜孤城復何處向暮一吹笳
扈從至馬蘭口登長城

張英

戍樓臨絕徼何意得躋攀縱目城南堡驚心塞北山
雲陰迷古堞峰勢逼蕭關戰壘清時廢微茫草樹間
帝治稱無外嬴秦始築墉高低綿衆壑掩映帶羣峰

萬古風霜色終朝虎豹蹤興亡不在險謾詗一九封

遊西山詩八首

張英

裂帛平湖淺初晴見水痕銜山飛練影穿石漱雲根
曲磴盤孤嶼危樓出短垣仙靈留窟宅丹竈此常存
玉泉

新月出松間尋僧叩竹關偶然同古佛一夕卧空山
風定泉聲細天晴鳥語閒津梁知己倦予亦謝躋攀
卧佛寺

路盡孤亭出千峰夕照中短牆籬落靜流水杏花紅
地已同愚谷名偏署退翁世人那易識還倩小谿通
退谷

莊嚴餘古寺泉響雜松聲鳥道穿林細龍湫遠戶清
丹青雲外濕金碧上方晴豈是龐居士虛傳谷口名

碧雲
寺

諸峰遙領處幽勝屬來青山翠何空濶天風自窈冥
宸章今尚在御輦此曾經絕似頻遊地江南木末亭

來青軒

鍾磬隔雲端林陰石徑寒千株環古栢數折跨層巒
日影穿林薄花田入望寬安能攜一卷長此獨盤桓

洪光寺
磴道

石門山寺寂松老發天香深院虬龍影高枝鼠雀鄉
瀟奔常作雨榦曲飽經霜盡日聞清籟天風掃佛堂

表忠觀
古松

徑轉疑無寺峰迴忽見亭野田雲盡白邛落樹微青

花塢春猶寂松關晝亦扃翠華留石碣蒼蘚立空庭

法海寺

曉日華林道鳬鷺宿淺沙新荷香在葉芳草露為華

碧瓦迷朝霧紅亭接曙霞幾年騎馬客鞭影起林鴉

金經王
鍊橋

渡滹沱河

陳廷敬

晨興起大河霜氣壓清波秋日石梁外人家漁浦多
遠鷗浮水去高葉起風過來往恒山道征車奈晚何

桃花寺弔李光四處士

宋 榮

幽絕招提境嘉名自昔云陽崖踈樹映大壑亂淙聞
日暖催紅杏堂空養白雲鹿裘邈何許猿鶴尚思君
藺相如墓

王士禎

智勇存危趙相如第一人特書王擊岳間道壁亡秦
故國山河改孤墳草木春魯連終蹈海千古共悲辛
次井陘縣

王士禎

千嶂通關路雙溪遶縣門亂流爭浦漱水碓聒朝昏

夕照魚蝦市寒烟桑柘村當年穆天子雨雪獵高原

古北口

張鵬翮

萬里長城北千山積翠阿遼關流水注環徑白雲多
燕雀簷前舞漁樵醉後歌

清時風月好率屬夜經過

石匣

劉巖

千巖磐石匣一綫宛蛇行出塞無多路防秋有舊城
馬依殘壘卧人入亂山耕猶聽斜陽外鳴鳴畫角鳴

密雲

劉巖

落日黑城川秋風白檀路
鵬盤塞口雲狐叫沙頭樹
彌節漢將軍發問秦謫戍
蒼茫戰壘殘颯颯飛霜露

古北口

劉巖

古戍勒兵屯千峰擁一門
犬牙交塞口鳥道插城根
寒燠天分劃山川氣吐吞
夕陽驅馬過烟滿磧沙痕
白溝河弔王彥章

宋希金

豹死名猶在身經百戰場
平生酬馬革風義感歐陽

野水流荒塚行人拜鐵鎗不知長樂老歷盡幾興亡

謁楊忠愍公祠

徐德泰

天意常扶直公生獨不逢有懷匡社稷無計去奸雄
碧血黃沙裏丹心諫草中我來瞻廟貌洒涕拜孤忠

詩 七言律

唐

幽薊新歲

張說

去歲荆南梅似雪今春薊北雪如梅共知人事何常

定且喜年華去復來邊鎮戍歌連夜動京城燎火徹
明開遙遙西望長安日願上南山壽一杯

過張處士祐故居

皮日休

滕華通子共悲辛荒徑今為舊宅鄰一代交遊非不
貴五湖風月合教貧魂應絕地為才鬼名與遺編在
貴臣聞道平生偏愛石至今猶泣洞庭人

過張處士祐故居

陸龜蒙

先生清骨莖烟霞業破孤存孰為嗟幾篋詩篇分貴

位一林石筍散豪家兒歌舊宅啼楓影姬遠荒田泣
稗花唯我共君堪便戒莫將文譽作生涯

聽話叢臺

李遠

有客新從趙地回自言曾上古叢臺雲遮襄國天邊
盡樹遶漳河掌上來絃管變成山鳥弄綺羅留作野
花開金輿玉輦無消息風雨誰知長綠苔

弔劉蕡

李商隱

上帝深居閉九閤巫咸不下問銜冤廣陵別後春濤

隔湓口書來秋雨翻只有安仁能作詠何曾宋玉解
招魂平生風義兼師友不敢同君哭寢門

燕昭王墓

羅隱

戰國蒼茫難重尋此中踪跡想知音強停別騎山花
曉欲弔遺魂野草深浮世近來輕駿骨高臺何處有
黃金思量郭隗平生事不殉昭王是負心

宋

奉使契丹古北道中

蘇轍

獨卧繩牀已七年往來殊復少
縈纏心遊幽闕鳥飛處
身在中原山盡邊
梁市朝迴塵滿馬
蜀江春近水浮天
枉將眼界疑心界
不見中霄氣浩然

高陽臺詩

曾布

樓臺丹碧照天涯
江北江南未足誇
千里烟波方種樹
萬株桃李未開花
一麾同下西清路
兩鎮高迎上將牙
回首林塘莫留戀
風流還屬阿連家

衣帶中詩

李若水

戎馬南來久不歸山河殘破一身危功名誤我等雲
過歲月驚人和雪飛每事恐貽千古笑此身甘與衆
人違私情惟有君親重血淚紛紛染客衣

入燕別親知

謝枋得

雪中松栢愈青青扶植綱常在此行天下豈無龔勝
潔人間不獨伯夷清義高便覺生堪捨禮重方知死
甚輕南八男兒終不屈皇天上帝眼分明

范陽

文天祥

督亢坡前草沒沙武安廟下客思家西風落日猶驅
馬北地秋陰亦見蛇不勞鄒衍重吹律何得張騫獨
泛槎從此南征思何限象林銅柱更天涯

登雄州城樓

文天祥

古樹寒雲接渺茫故鄉游子動悲涼江山自古少佳
客烟雨為誰留太行野色分將愁外綠物華散出夜
來霜海門何處秋聲急極目蒼波空夕陽

望易京

文天祥

亂山西下鬱岩竟還我燕南避世謠天作高秋何索
寞雲生故壘自飄蕭誰教神器歸羣盜只見金人泣
本朝莫怪風雷有餘怒田疇英烈未全消

登武遂城

文天祥

神州英氣鬱高寒臂斷爭教不再連千古傷心有開
運幾人臨死問幽燕平生卧榻今如此百萬私錢亦
可憐咫尺白溝已南北區區銅馬為誰堅

金

樓桑廟

周昂

暗粉陳丹半在亡，短垣喬木共悲涼。
不須古碣書綿竹，猶有荒村記葆桑。
塵土衣冠曾繫馬，歲時歌舞亦稱觴。
不應巴蜀江山麗，能使英靈忘故鄉。

晚登遼海亭

高士談

登臨酒面灑清風，竟日憑闌興未窮。
殘色樓臺山向背，夕陽城郭水西東。
客情到處身如寄，別恨他時夢可通。
自歎不如華表鶴，故鄉長在白雲中。

故城道中同元東巖賦

郝俟

客亭南北厭飄零尚喜揚鑣過故城
桐葉不堪追往事泥丸尤足見民情
青山閱世幾興廢白塔向人如送迎
佇立夕陽無限思西風禾黍動秋聲

元

過徐橋

劉因

老岸石欄曙色分只疑身是入山雲
千年往事不回顧百里清泉如可聞
人世誰教有長路坤靈終亦在

塵氛興亡更遣陂塘在幾欲悲歌酒未醺

登中山北城感祖奉議君死節

劉因

黃金一夕冷如鎖劉項蕭然恐未真世事惡盈應有
數天心撥亂豈無人陵遷谷變橫流地卽覆巢傾死
節臣毛髮諸孫生氣在九原精爽凜猶新

樓桑廟

郝經

興王百折似高皇垂老纔能據一方鄴下只知移漢
鼎江東不肯帝劉郎十年生長林猶在三代君臣道

未亡涿水都為永安淚子規啼血怨樓桑

送竇漢卿先生

許衡

西山山下覓幽邨水竹鄰居擬卜君豈意天書下白
屋便收行李入青雲功名准自英賢立得失防因去
就分萬里風沙渺南北請歸消息幾時聞

上京寓直

馬祖常

萬里風沙碣石西高樓一望夕陽低谷量牛馬烟霞
錯天險山河海岱齊貢篚銀貂金作藉官窰磁盃玉

為泥未央殿下長生樹還許尋巢彩鳳棲

輓文山丞相

虞集

徒把金戈挽落暉南冠無奈北風吹子房本為韓仇
出諸葛寧知漢祚移雲暗鼎湖龍去遠月明華表鶴
歸遲不須更上新亭望大不如前洒淚時

和馬伯庸上京寓直

柳貫

烏垣落日稍沉西南極青山女堞低馬谷夏泉經雨
漲龍堆秋草拂雲齊一函祠檢將升玉萬里九封不

用泥瀑直夜涼談往事乘車猶欲避鷄棲

遊竹林寺

薩都拉

野人一過竹林寺無數竹林生白烟江左玉龍埋碧
草月明黃鶴下青田樹啣宿雨藏山鷓花著春風老
杜鵑何日來分雲半榻故人不用買山錢

登慈忠寺閣

張翥

百級危梯遡碧空憑闌浩浩納長風金銀宮闕諸天
上錦繡山川一氣中事往前朝僧自老魂來滄海鬼

猶雄只憐春色城南苑寂寞餘花發舊紅

大都雜詩

宋本

拋却漁竿滄海邊拂衣來看九重天畫闌九陌橋如
月綠影千門樹似烟南國佳人王幼玉中朝才子杜
樊川紫雲樓上如澠酒孤負春風二十年

繡錯繁華偏九衢上林辭賦漢西都朱門細婢金條
脫紫禁材官玉鹿盧萬里星辰開上界四朝冠蓋翊
皇圖東鄰白面生紈綺笑殺楊雄卧一區

盧溝曉月墮蒼烟十一門開月色鮮海上神山無弱
水人間平地有鈞天寶幢珠珞瞿曇寺豪竹哀絲璫
瑣筵春雨如膏三萬里盡將嵩呼祝堯年

形勢全燕擁地靈梯航萬國走王城狗屠已仕明天
子牛相寧知別太平玄武勾陳騰王氣白麟赤鴈入
新聲近來朝報多如雨不見河南召賈生

燕中懷古

李源道

荆卿墓上草離離郭隗臺邊對落暉戰國山川秋氣

壯中原豪傑曉星稀乾坤納納無人識南北年年自
鴈飛說似盧溝橋畔柳安排青眼送將歸

叢臺詩

陳孚

數點寒峰擁翠嵐叢臺日落見漳南火枯襄子殘銅
斗土蝕平原舊玉簪宮閑沙丘空有崔兵吞圃谷已
如蠶回仙逆旅今存否世上黃梁正夢酣

明

盧溝橋

金幼孜

盧溝天矯出桑乾月照河流下石灘
茆屋鷄聲斜漢曙沙汀鴈叫早霜寒
水光漠漠山烟白野色搖搖塞草殘
千古長橋枕南北憶曾題柱倚闌干

謁文山祠

薛瑄

朔氣蕭森歲向深揮戈投淚動哀吟
艱危已竭回天力慷慨猶存捧日心
海水尋常秋月冷燕雲千里暮星沉
悠悠往事都如夢只有孤忠照古今

盧溝橋北上

楊榮

河聲流月漏聲殘咫尺西山霧裏看遠樹依稀雲影
澹疎星寥落曙光寒石橋馬跡霜初滑茆屋鷄鳴夜
未闌北上已看雙闕近五雲深處是金鑾

春夕保安旅懷

鄧林

萬里東風故國情十年幾度鳳凰城衡陽鴈盡春三
月巫峽猿啼夜二更席上狂言因酒得鏡中華髮爲愁
生靜觀富貴如雲轉拂袖歸來任俗爭

長安嶺晴日

葉盛

星垂箕尾洞天開
況自晴雲捧日來
直北關山同淑氣
向陽花木自春臺
且看使者乘槎去
又報番王進馬回
幾度閒登最高處
分明樓閣見蓬萊

燕臺懷古

岳正

督亢陂荒蔓草生
廣陽宮廢故城平
秋風易水人何在
午夜盧溝月自明
召伯封疆經幾換
荆卿事業尚虛名
黃金不置高臺上
似怪年來士價輕

賈島墓

李東陽

百里桑乾繞帝京
浪仙曾此寄浮生
墓來詩骨青山瘦
望盡荒原白草平
無地椒盤供廟祀
有人驄馬問村名
穹碑四尺標題在
辭賦風餘萬古情

西山雜詩

李東陽

潭影蕭蕭碧樹寒
一亭山色俯潺湲
疎林隔寺聞僧語
落日登臺見鳥還
塵事豈知明日異
吏情應識野人閒
丹崖翠壁潘郎興
長恨巉巖不共攀

西山

李東陽

長為尋幽愛遠行更於幽處覺心清祇園樹老知僧
臘石壁詩存見客名望入樓臺皆罨畫夢驚風雨是
秋聲人間亦有無生樂化外虛傳舍衛城

南園

李東陽

別苑臨城輦路開天風昨夜起宮槐秋隨萬馬嘶空
至曉送千旂拂地來落鴈遠驚雲外浦飛鷹欲下水
邊臺宸遊睿藻年年事況有長楊侍從才

玉泉道中

李東陽

日照山山紫翠生
雨餘秋色更分明
蜃樓出霧東浮海
雉堞連雲北繞城
舊識郵亭猶問路
漸多僧寺不知名
十年幾度登臨約
未盡平生吏隱情

謁文山先生祠

桑悅

衣帶留題誓始終
小樓數載履虛空
誰云到死方無悔
要識時危不是窮
異物化生真幻語
元神出現亦精忠
堂堂祠宇還柴市
宋室全收養士功

玉泉道中

劉大夏

晚來聯騎踏晴沙風景蒼蒼一望遐幾處白雲前代
寺數邨流水野人家鶯啼別墅春猶在馬到西山日
未斜回首不知歸路遠九重宮殿隔煙霞

謁狄梁公祠

倪岳

城西親拜狄公祠袍笏森然仰令儀此地孤雲心尚
在中天落日手曾支平生事業存唐史一代文章託
范碑聞說邑民能報德春風香火重追思

遊西山

馬中錫

載酒追陪出鳳城，村村風景足閒行。
石田白鳥衝人起，茅屋青旗傍柳橫。
路向斜陽蕭寺去，詩過流水小橋成。
歸來半醉黃昏後，馬首山花弄月明。

再過狄梁公祠

程敏政

崇祠香火傍高林，想像生容一正衿。
猛虎尚酬良吏手，牝雞能拂老臣心。
孤雲渺渺回天末，短日悠悠及歲陰。
古道荒榛知不遠，瓣香他日再來尋。

太寧山

儲罐

石磴夤緣路轉遲
白雲留客媚晴姿
秋暄不似高寒地
山靜真如太古時
何處風迴微有籟
茲遊境勝却難詩
放歌欲到遺臺上
愁對馮公倒酒卮

春遊香山寺宿林宗師房次韻 王守仁

幽壑來尋物外情
石門遙指白雲生
林間伐木時聞響
谷口逢僧不問名
天望倒涵湖月曉
烟梯高接緯堦平
松堂靜夜渾無寐
到枕風泉處處聲

望湖亭

文徵明

寺前楊柳綠陰濃檻外晴明白映空客子長堤嘶倦
馬夕陽高閣送飛鴻天浮野色行踪外人在扁舟落
照中三月燕城花滿地春光都向碧雲東

西湖

文徵明

春湖落日水拖藍天影樓臺上下涵十里青山行畫
裏雙飛白鳥似江南思家忽動扁舟興顧影深懷短
綬慚不盡平生淹戀意綠陰深處更停驂

同王元美泛舟衛河話別

謝榛

王郎乘舸下重灘相送清樽一盡懽客路艱虞知己
在老年離合定期難月光初上孤帆落秋氣平分萬
木寒後夜登樓歎圓缺迴瞻北斗是長安

與馮開之登毘盧閣言別

屠隆

闕山萬里毘盧閣坐傍空王覽薊丘雙闕晴臨千樹
出高城寒抱大河流西風浩蕩開秋色落日蒼茫生
暮愁奈可登高復送遠令人對酒不能酬

登盤山絕頂

戚繼光

霜角一聲草木哀雲頭對起石門開朔風邊酒不成
醉落葉歸鴉無數來但使雕戈銷殺氣何妨白髮老
邊才勒銘峰上吾誰與故李將軍舞劍臺

觀海亭

戚繼光

曾經澤國鯨鯢息更倚邊城氛祲消春入漢關三月
雨風吹秦島五更潮但從使者傳封事莫向將軍問
賜貂故里蒼茫看不極松揪何處夢魂遙

鎮東樓

戚繼光

樓前風物接遼西日暮憑闌望欲迷
禹貢萬年為紫極秦城千里靜
雕題蓬瀛只在滄波外宮殿遙瞻北
斗齊為問青牛能復度願從仙吏換刀圭

題龍潭

戚繼光

紫極龍飛冀北春石潭猶自守蛟人
風雲氣薄河山迥閭闔晴開日月新
三輔看天常五色萬年卜世矚
衷宸同遊不少振鱗志獨有波臣愧此身

春日集韋園

李言恭

路轉長溪十里斜滿村春水浸蘼葭池邊曲檻圍芳草樹底輕舟載落花樓閣晝涵滄海氣衣冠晴帶紫宸霞開尊況有高陽輩何必風流說習家

幽徑藤蘿晝亦寒黃塵不上竹皮冠數家楊柳陰低戶到處桃花護曲欄白日忙隨芳草暮青山偶共故人看淹留自笑於時幾歎息閒人坐釣竿

題開州御井甘泉

甘澤

鎮兵跋扈警中原十萬王師擁至尊調膳當年資王

鼎烹葵此日到蓬門
穹碑尚有迴鑾字
大路都無過輦痕
一自君臣南去後
月明花落幾黃昏

開平王廟成應制

劉子華

揮戈十載定河山
忽報星沉易水灣
馬首西風旌旆捲
天涯落日凱歌還
功成楚漢興亡際
名在韓彭伯仲間
聖主思功心獨苦
黃金直欲鑄真顏

雨行北安門湖上

于慎行

湖上牕欄如畫舟
一天涼雨入宮秋
平橋蘆荻蕭蕭

冷別浦鷗鳬汎汎流霧色近迷三苑樹煙光遙際五
城樓時清湛湛多濃露十里芙蓉接御溝

題旌忠祠

石星

盛代孤忠北斗看經過還復拜衣冠霜飛六月金臺
慘風起千秋易水寒諫草獨明臣節在死生終藉主
恩寬椒漿欲奠愁迴轍雨血蕭蕭木葉丹

送友之天津

李三才

送子維舟潞水濱沙光柳色弄晴春向來朋輩驚誰

在此去琴樽祇獨親何事牙籌煩傲吏却教黃鳥怨
騷人慙勤斗酒休辭醉不為陽關淚滿巾

遊盤山

王衡

塞北山河百二重太行雲氣入提封泉爭亂壑時縈
馬谷響虛巘半是松紫邏煙花當九月青天雷雨出
雙龍朝來策杖中盤寺指次經行第幾峰

薊門秋興

申用懋

佳陰偏自惜三餘薊障功名總不居珠粒供餘金粟

偈騎塵銷向玉杯書溫寒立候醫無力奇正旁參局
已踈運甕漸諳酬世理問君何事不歸歟

薊鎮閱兵

申用懋

元戎豹尾駐中堅旗影如山北斗懸浴鐵有聲驅汗
馬輕裘無策洗烽煙已拚碧血凝燕市

時得罪崔魏
緹騎已出國

門故
云

肯任黃花莽戍田雷電迴旋諸隊裏可能細柳

復如前

薊門會閱

劉應節

大將臨戎親合圍
貔貅十萬鐵為衣
月明虎帳傳刁斗
風捲龍沙列羽旗
轉戰河源邊地動
屯軍塞口陣雲飛
壯猷此日推元老
談笑樽前賦采薇

謁北嶽廟

劉應節

大茂山深擁帝州
曲陽宮殿肅清幽
地含靈氣常多雨
風入邊聲故早秋
冀野關河盤地轉
玄天星緯抱雲流
聖朝禮樂仍虞典
不用登封五嶽頭

黑帝高臨太乙都
登壇玉陛照金鋪
明堂裡祀還今

古畫壁精靈信有無東里雲霞連紫鳳北來烽火隔
蜚狐籌邊謾道兵車力海嶽千年是壯圖

本朝

出沙坡峪登西長嶺絕頂

李 霽

鳥道縈紆一綫盤
竭來雲表駐征鞍
雉羣低向榛叢
落虎跡深從雪後看
沙磧如霜青嶂繞
塞垣似帶紫
濛寬壯遊忽動
寨裳興不憶風塵
行路難

春日過盧溝橋

魏裔介

桑乾直下連滄海天矯青龍控

帝畿寥落長空寒過鴈朦朧煙樹曉聞鷄香山晴氣歸雙
闕榆塞風霜上馬蹄咫尺五雲頻眺望春風已到薊
城西

巡行駐保定謁楊椒山先生祠

魏象樞

不與先生出處同此心切切仰高風生來直氣天難
折謫後良辰命不逢兩疏萬言真大罪千秋一日是
孤忠

先皇表出余應拜駐馬低頭入廟中

潞河曉行

沈 荃

霜華冉冉點征袍匹馬蕭蕭感二毛
曉霧遠含三殿迥晴雲深護九門高
飛標鳴鏑紅塵暗擊筑彈箏白日豪
更喜六龍親校獵長楊別館醉葡萄

登天寧寺大悲閣

沈 荃

傑閣峻嶒倚碧霄無邊花雨晝飄飄
千年龍象凌空矗大陸雲山入望遙
金殿香燈留御蹕穹碑文字識

前朝憑欄不盡登臨意
瑟瑟天風下沈淒

邯鄲

宋琬

趙王宮北古叢臺
歌舞當年翠輦來
白馬大梁公子過
黃金東海魯連回
三千珠履人何往
十五銀箏歌自哀
寂寞平原坏土在
麒麟荒缺卧蒼苔

咏翰林院中古蹟

陳維崧

黃帕低籠雪藕寒

九重分賜遍長安
滌來院吏尋冰井
踏處牆陰觸石欄
瑟瑟

瑟銅瓶苔影薄
涓涓碧玉翫葉聲
乾玉堂舊事知何限
欲溯風流想像難

劉井

瀛洲誰料尚能來
藥院荷潭面面開
聞說前朝柯學士
種將雙樹傍空臺
蒼皮繡甲參天質
嘯雨呼風不世才
為撫茶陵遺墨在
索鈴掣手罷首重回

柯亭

土木堡

朱彝尊

平蕪一簣狼山下
九月驅車白霧昏
到眼關河成故跡
傷心土木但空屯
元戎苦戰翻迴蹕
諸將論功首

奪門早遣金縵和社稷祠官誰奉裕陵園

宣府鎮

朱彝尊

南城西北控燕都吹角清秋落日孤尚憶武皇巡王
塞親從鎮國剖金符宮槐御柳今蕭瑟虎圈鷹坊舊
有無邊事百年虛想象誰誇天險塞飛狐

過樓桑村謁漢昭烈廟

宋 犖

弓遺白帝志難償正統千秋自蜀疆古廟歸然當獨
鹿新枝沃若發樓桑雲旗羽箭關張侍乳燕鳴鳩禁

藥荒讀罷迎神碑上曲梓花開落又斜陽

上谷謁揚椒山祠

宋 肇

歷盡艱危謫遠方還將一死震巖廊批鱗目已無丞
相列俎人爭拜奉常夢裏鑪元有志街頭枷鎖任
飄香靈風蕭颭鬚如戟庭舞神鴉老檜蒼

古蓮池

王 胤

綠樹重陰逐岸迴紅蕖一勺練塘開凌波真奪靈妃
豔出水應分謝客才他日帆檣張錦繡至今歌吹繞

樓臺野人坐愛荷風好黃帽青鞋恣往來

望郎山

王 貺

西峰不與亂山連自插芙蓉列紫烟疊嶺總浮朝氣
上懸崖疑墮夕陽邊寒通大漠千秋雪晴照中原萬
里天憶挽長蘿凌絕頂褐衣金策倍翛然

清苑河

王 貺

清溪一曲帶雙流東下遙連碧海浮錦浪春生花漾
漾金波秋泛月悠悠雲停白舫臨津市風颺青帘近

水樓會著荷衣乘興去長竿烟雨挂滄洲

廉將軍廟

王鶴

雕戈北指陣雲深鐵甲南遷旅思侵自合將軍生白
髮非關使者愛黃金三朝思遇亡臣淚百戰驅馳故
國心豈謂叢臺蕪沒後燕人伏臘到於今

宋廣平祠墓

陳廷敬

鳳闕衣冠古廟荒關山秋曉更斜陽一時仙李原春
色千古梅花自異香轉恨君王空蔓草獨看隴墓下

黃羊魯公遺跡徘徊久
新月泠泠映石牀

雪後過西苑

何采

雪花馬首望崔巍
十二高樓玉作堆
日下鴉隨團扇影
夜來蝶舞洗粧臺
人依北斗南城近
路轉西華左掖開
曾識梁園多盛事
徘徊時復憶鄒枚

宿黃花山

張英

四圍青嶂繞東菑
栗里柴門護短籬
好水好山春草路
輕煙輕雨杏花時
池魚忽縱曾遊壑
籠鶴驚回舊

宿枝歸向紅塵最深處馬蹄何事更嫌遲

趙北口題旅壁

王士禎

趙北燕南水四圍此中避世可忘機
離離芡實迎秋熟拍拍鷗羣接翅飛
漁舍半連黃篾舫釣人相映綠簑衣
淮南小別成千里魚稻珠湖願已違

謁楊椒山祠

李基和

諫馬無人請尚方孤忠正氣滿巖廊
先生自命真員外死後何勞贈太常
十罪分宜遺臭在雙祠上谷薦

蘋香重來再拜還稽首憂國當年鬢未霜

衡水尋源

李基和

觀瀾有術當探穴掘地尋泉欲問津口授村農重記
憶手繙經史再諮詢桑田已失虞書舊星海驚傳漢
使新萬世聖人憂在水誰將饑溺繪吾民

揚令公祠

方象瑛

寰朔城邊殺氣豪行祠猶拜舊旌旄黃沙白草三關
壯鐵馬銀戈百戰勞報國自知非力屈捐軀終不掩

功高魂來何處揚無敵遺憾當年濺血袍

蒯文通墓

方象瑛

廣渠門外俯荒邱狙詐還聞此地留王氣應知歸漢
祖奇謀原不負韓侯書傳雋永人誰問憤到佯狂死
未休鳥盡弓藏千古恨寒燈井上夜深遊

秋日歷臺南諸村觀水有感

王原祁

中流四顧悵平原到處蕭條水上村殘照頽垣倒影
動垂陰疎柳逐波翻三年潑灑無寒暑百里烟光失

曉昏不是

尚方頻賑貸蒼生疾苦向誰論

聞比部奉

命將至大陸澤勘水二首

王原祁

一官四載歎時窮澤國千村杼柚空
正喜繪圖方抗疏忽驚乘傳又觀風

恩波縱使從天降水勢何由入地中
最是鷗鳬飛上下憂勞無計集哀鴻

新綸捧出鳳城東下吏勞勞手版通鴈叫寒汀秋水白馬
嘶斷渡夕陽紅折腰今日思陶令持節何人是汲公
大陸幾時疏故道悲涼心事望洋中

晚登古長城戍樓

陳天植

薄暮登高古戍樓長城雄峙海東頭燕山冷照秦時
月榆嶺遙傳白帝秋浪說終軍能款塞獨憐李廣不
封侯當年誰設安邊計萬里雲寒似築愁

登叢臺

劉佑

突兀荒岡徧草萊行人猶為武靈哀金輿翠輦歸何處
山色河聲依舊來龍戰幾年驚趙壁馬嘶此日繞
叢臺休悲探轂沙邱事挾瑟憑高醉不回

過方順橋滿城道中即事

楊大鶴

炎歊車馬耐駸駸差喜今朝日脚陰半壁好山爭入
眼一天涼雨快披襟牆歌野郭紅飄槿村靜炊烟綠
暗林觸處風光轉蕭瑟新秧如剪故園心

昌平弔劉諫議

陶祥武

玉溪風義平生少宗伯碑題歲月深

祠有明董宗伯碑記手書以風

策一第詎厭才士望萬言未盡直臣心祠稱司戶猶

存憤塚沒荒原不可尋駐馬低徊忘日暮涼飈蕭瑟動高吟

謁楊忠愍公祠

申重熙

西城憑弔不勝悲員外祠堂讀

御碑浩氣永隨山岳壯

綸音高並日星垂權姦未死神先奪假子求榮辱已追何

似先生枷鎖後香風猶向市朝吹

謁楊忠愍公祠

張慎言

當道豺狼敢擊彈先生孤憤特衝冠
名高豈是純臣意廟食猶增義士歎
堪笑乾兒思縛虎可憐愛子竟輸肝
於今禍福難回首千古長留一寸丹

謁楊忠愍公祠

陳福

御碣親標諫草芳高祠瞻拜景餘光
鋤奸必試擒王手憂國常先曲突防
勁骨有時銷鼎鑊丹心終古懾豺狼

青詞邀寵今何在賸取孤魂泣道旁

蓮花池次韻

徐德泰

方塘十畝絕纖埃且喜公餘偶一來
翠蓋翻風搖玉佩紅衣浥露泛金罍
亭臺影落長堤外鷗鷺機忘曲水隈
自是

聖朝恩浩蕩故教上谷有蓬萊

畿輔通志卷一百十九

欽定四庫全書

畿輔通志卷一百二十

詩 五言排律

唐

太宗望海

披襟眺滄海憑軾翫春芳
積流橫地軸疏派引天潢
仙氣凝三嶺和風扇八荒
拂潮雲布色穿浪日舒光
照岸花分彩迷雲鴈斷行
懷卑運深廣持滿守靈長

有形非易測無源詎可量洪濤經變野翠島屢成桑
之罘思漢帝碣石想秦王霓裳非本意端拱且圖王

太宗中山

驅馬出遼陽萬里轉旂常對敵六奇舉臨戎八陣張
斬鯨澄碧海卷霧掃扶桑昔去蘭綦翠今來桂染芳
雲枝浮碎葉木鏡上朝光回首長安道方歡宴柏梁
奉和春日望海應制

楊師道

春山臨渤海征旅輟晨裝迴瞰盧龍塞斜瞻肅慎鄉

洪波迴地軸孤嶼映雲光落日驚濤上浮天駭浪長
仙臺隱螭駕水府泛鼉梁碣石朝煙滅之罘歸鴈翔
北巡非漢后東幸異秦皇塞旗羽林客拔距少年塲
龍擊驅遼水鵬飛出代方將舉青丘綴安訪白霓裳

奉和宴中山

許敬宗

飛雲旋碧海解網宥青丘眷德停八駿觀風駐五牛
張樂臨堯野揚麾歷舜州中山獻仙醕趙媛發清謳
塞門朱鴈入郊藪紫麟游一舉氛霓靜千齡德化流

酬張子祁

戴叔倫

野人無本意散木任天才分向空山老何言上苑來
迢遙千里道依倚九層臺出處寧知命輪轅豈自媒
更慚張處士相與別蒿萊

樂城館中還歸

張子容

異縣天隅僻孤帆海畔過往來鄉信斷留滯客情多
臘月聞雷震東風感歲和蟄虫驚戶穴巢雀起庭柯
徒對芳樽酒其如伏枕何歸來理舟楫滄海正無波

明

永平道中

王世貞

盧龍左馮翊白馬舊安西浴日滄溟小
摧天碣石低
虎沉飛將羽龍出慕容題驅傳令支塞問津卑耳溪
荒祠孤竹並讓國大名齊引首哀兵鏃沾膺愧馬蹄
榆關秋一帶慎莫動征鼙

過昌平擬上經畧許中丞

王世貞

豹隱終南奪龍韜薊北專建牙三輔色吹角七陵煙

星斗青萍外闕河紫氣前雙鵬下鳴鏑萬馬聽揮鞭
辟易燕支嶺崢嶸苜蓿天高樓明月嘯橫朔大風篇
白髮籌邊早黃金募士偏還應報烽火不復近甘泉

莫春蓬雀山恭謁神應王廟

傅梅

扁鵲何年廟巍然倚太行神功徵異代徽號等諸王
禮重春秋祀衣垂日月章鐘聲喧綺閣幡影暗雕梁
碑勒前朝字爐焚外國香丹青存古碧苔蘚剝虛廊
八柱龍蛇動孤壇鶴鶴翔峰霞明爛熳邨樹遠蒼茫

霧重晴疑雨山空晝亦涼虹橋寒溜響鳥道野花芳
青嶂千屏立白雲匹練長栢根穿石窟桃藥媚春陽
何處無靈藥當年有秘方上池疑此地想像受長桑
春日同冀甫侍御傅元鼎明府武靖甫孝廉李
膏乙茂才游蓬鵲山

白南金

勝會逢三月同遊屬二難星從河朔聚劍自斗牛看
御史乘驄馬王孫佩紫蘭春風吹緩帶爽氣度層巒
天險雲移杖霞明晚當餐丹青垂古廟香火間元壇

幢影凌煙起鐘聲落水寒
栢蟠交徑石柳蔭一邨灘
草色都分席桃花半插冠
攀崖僧掖久歌曲鳥聽殘
月小流光細杯深引量寬
長卿雖病渴猶伴故人歡

直沽城

王洪

水出漁陽郡山橫薊北天
高樓瞰海日遠嶼入江煙
市集諸番船軍屯列陣田
風高悲鼓角霧重失旌旃
匪獨關河壯由來節槩全
精兵亘雲朔勁騎出幽燕
大漠黃塵外三韓落照前
將持定遠策不用繞朝鞭

本朝

讀明季魏孝子學淵贈鹿太公百韻詩摘四十韻

李光地

明衰當晚造時事沸於湯亂象成郊野深根起廟廊
蠅營淪白黑龍戰混元黃占得守宮兆星搖宦者芒
晉君迷二豎秦國棄三良處士推東漢清流湛末唐
祖宗優積累節義遂成行慘裂間周魏彫殘繼左楊
即家誅宿舊提逮出軍廂孝子紛營護忠臣自慨慷

緹縈誠可憫張儉豈曾藏烈烈名家子哀哀岐路傍
上書嗟聽遠避迹畏聲揚投命明知德抽肝發頌章
閒情皆懇款苦調反鏗鏘猶切完巢望終罹滅性殃
詩辭盈百韻才藻歎兼長宜作時之瑞如何遇不祥
瓊英灰烈焰碧蕙殄秋穰漫說身無就吾云行已芳
不亡是眇壽何處論彭殤鹿氏傳忠孝燕臺擅族望
直辭批袞闕偉績佐巖疆子也遑將父翁言但死王
太公故韋素義問滿衣裳交盡南州彥亭齊北海香

奉常怡暮景閣老事高陽雨化江村席風移易水鄉
承顏伸稚慕蒿目激中腸他日孤城碎空身白刃當
賢郎哀毀甚魏子後先相始悟茲亭閣無心海內颺
平生多與許變故忍忘將直為憂同病非因救有喪
草枯憐臭味孤死痛悲傷任俠寧堪擬求仁庶可方
山戎表孤竹昌國剩汶篁臣子垂千祀幽燕有耿光
斯人良繼躅況我舊乘障感彼蓼莪什賡歌為變商

壬申八月

皇上駕幸古北口道獻嘉禾一莖數穗

命侍臣馳送午門傳示百官蓋見稼穡之為寶而禎祥所
不尚也然惟不以為瑞而瑞莫大焉恭紀五言

排律二十韻用誌盛事

楊大鶴

六飛巡幸日萬寶告成時朔野金風拂秋原玉穗披縱橫
連穎發左右帶芒垂殖自西山種栽從北里移飄香
隨輦路吐秀溢邊陲共識中和蘊緣知品彙滋壤壚
膏並沃稔黍性皆宜異畝其同穎駢莖共挺枝歲功

當泰運物類應昌期遠服俱呈瑞明堂正受釐勞謙
宗聖德優渥慶天施闕下千官列雲中一騎馳歡呼齊紫
陌拜舞徧彤墀金縷銀綃賦黃蕊黑氍毹稱揚從古
昔徵驗邈今茲鮮阜虞琴奏盈寧曲管吹烝嘗歌億
秭保介誦京坻一氣原相感交孚信有之世咸臻渾
噩靈畫効神祇敢獻嘉禾什難伸鳧藻私

永定河告成

姜宸英

民瘼知何限

皇心實未寧自天來滲漉行地到滄溟水是渾河舊源從
石景經奔流嗟在昔潤下有誰令漲合桃花泛歌成
瓠子聽禹功秉壁告漢績勒碑銘況異懷襄勢兼資
黍稷馨一呼畚鍤就不日鑿疏停飲犢隨田父眠鷗
任釣汀沿堤間滑滑映畝見青青擊壤多同樂行吟
少獨醒

賜名徵

帝力長此護生靈

保定謁楊忠愍公祠兼讀遺集

陶祥武

兩疏千秋壯雙祠
百代名中流思砥柱
吾道有干城
筆落寒姦膽風高恥義聲
丹心悲未了鐵骨氣猶生

御碣旌遺直

宸章表獨清
聞風起頑懦
瞻像動精誠
枷鎖餘香遠
乾坤一蒂輕

公詩有此身不是乾坤蒂留我蒼天欲若何句

遺編重展誦憤激涕

縱橫

壬子孟春改定營田恭紀

王恪

睿照懸離日

綸音轉吳風土宜徵物性歲歛識農功流濁苗方盛泥留
岸日崇旱乾難潤下泛溢更遙冲盡善資羣策無欺
効蓋忠良謨陳地利碩德啟

宸聰太僕分巡重尚書總制隆山區圍瘠薄水脉夾寵從
勢險尋常外

恩移浩蕩中便民仍舊貫履畝賜恆豐原隰高卑露林谿
曲折窮歡聲輿望慰喜色衆情通輔助 賢王畧承

宣

聖主衷史臣書大有從此萬方同

詩 七言排律

本朝

保陽郡城古蓮花池為元將張柔故宅亭軒疎廠
景物宜人向稱勝地癸丑夏日奉

命建設書院遂卜基於此

聖德作新士風丕振敬賦七言長律十六韻用紀其盛

陳福

韋杜風雲閣閣通士林加沐

聖恩隆經帷平啟蓮池勝講席遙承

桂殿崇舊創亭臺推甲第新移鐘鼓換琳宮高槐尚識

將軍樹茂草爭披君子風三輔生徒趨宛洛萬邦聲

教首岐豐蹇我書棟奎文麗漱灝澄波月印融傑閣

收藏仍萬卷

池上舊有萬卷樓

園橋觀聽擬三雍雲垂寶笈

緡金匱氣繞珠璣吐玉虹翠蓋曉分藜燄碧丹房宵

映蠟紫紅絃歌更足拈花笑香豔寧誇採藻工霧起
鱣堂知隱豹薪傳鹿洞鄙雕蟲湔磨麗澤藏修密
濯蒙泉德性充逸足駸駸方樹駿英聲奕奕競流鴻
早看淳俗登三古旋聽嘉謨達四聰鳴鶴滿陰占子
和

飛龍當御慶雲從高陽嶽麓多名蹟何似

昌期仰

帝功

古蓮花池建設書院恭紀

陶祥武

蓮池勝地絕塵埃舊日元戎甲第開

為元將張柔故宅

帝德文明先譽髦

皇仁樂育起蒿萊樓高橫翠丹青古

橫翠樓為保陽勝蹟

亭架臨漪

錦繡堆

池上有臨漪亭

碧蓋向依蒼珮展紅衣新傍絳帷栽

浮錢沼上占風動墜粉花前見子來萬卷藏書雄上

谷

池北舊有萬卷樓

千金市駿重燕臺蜚英聿起

畿南秀連茹羣空冀北材几席影涵明鏡裏絃歌聲繞

綠雲隈文心活潑源頭水生意參差雨後苔學遡瀨
溪敦夙愛香傳華井毓靈亥雍雍振鷺儒風茂郁郁
菁莪

聖澤培三輔山川同炳蔚

九天雲漢仰昭回

昌期首閭蓬壺境紀筆深慚作賦才

邯鄲道上恭謁呂仙祠感懷十韻 申重熙

昔聞青犢壚邊事今向黃梁道上行清濁漳流朝暮

續聰明山色古今橫迴車義重依然巷完壁功高奚
宮城漸老漸諳消長理看雲看徹往還情閒心種種
吟方穩噩夢依依意亦平駐景丹砂終妄想忘懷白
墮豈逃名昌黎牛斗雖由命絳縣塗泥實自輕長揖
未曾干顯者辦香或可拜先生華胥儼在人間遇蕉
鹿原非枕上爭擬伏詩媒乞仙術夢回鐘鼎舊家聲

詩 五言絕句

唐

易水

駱賓王

此地別燕丹壯士髮衝冠昔時人已沒今日水猶寒

郭隗

陳子昂

逢時獨為貴歷代豈無才隗君亦何幸遂起黃金臺

幽州

李益

征戎在桑乾年年薊水寒殷勤驛西路此去向長安

造書臺

岑參

野寺荒臺晚天寒古木悲空街有鳥跡猶似造書時

登郭隗臺

皇甫松

燕相謀在茲積金黃巍巍上者欲何顏使我千載悲

除夜宿洛州

白居易

家寄關西住身為河北游蕭條歲除夜旅泊在洛州

五代

竇氏五子

馮道

燕山竇十郎教子以義方靈椿一株老丹桂五枝芳

金

郎山雜詠

趙秉文

造化搏清氣秀出天城山
青松伴僧老白雲如我閒
天城

房駟落人間入石露雙碧
月明聞夜嘶驚落山頭石

馬耳
峯

藹藹春雲滋巖溜滴泉乳
獨留一泓碧去作人間雨

泓雲
泉

南北兩石門上下一靈鷲
仰看蓮峯立忽見天門透

上龍門

亂峯排鳥道一水會龍門禹力不到處猶知滄海尊

下龍門

元

邨居雜詩四首

劉因

鄰翁走相報隔窗呼我起數日不見山今朝翠如洗
黃昏雨氣濃喜色滿南畝誰知一夜風吹放門前柳
獨立偶懷古臨風還自傷一聲樵唱起回首暮山蒼

削樹題詩句畫沙知酒籌他年成故事蕭散更風流
明

西山

郝敬

西山三百寺十日徧經行歸與家人語山多不記名
慈恩寺

李東陽

水繞湖邊樹花垂石上藤長來寺前坐不識寺前僧
廣福觀

李東陽

飛樓凌倒景下照清徹底時有步虛聲隨風度湖水

夏日過韋園作

陶望齡

清池不濡軌時有幽路臨流微風來端坐意已足

本朝

過滄州

王士禎

春草千里合春波兩岸生迢迢新柳色碧過州兮城

趙簡子渡河處

王士禎

鷄鳴問津吏冰雪滿交河日上迴風起如聞河激歌

燕京郊西雜詠

朱彝尊

香山十八盤盤盤種松栢唯見獨行僧稀逢採樵客

十八盤

高梁寒食時昔年盛游冶隔水百重花長堤兩走馬

高梁河

鯈魚千百頭湖水二三尺有時白雲生不見釣臺石

釣臺

吾笑石季龍爾何知好士羅致山城中哀哉數君子

君子城

雕宮委礪礪暗粉剝莓苔想見明昌日芙蓉殿脚開

殿芙蓉

亂石侵花當奔沙擁樹根黃牛岡上月橫笛過前村

同黃牛

壤磴接雲根流泉來樹底婉轉入僧厨淙淙鳴不已

浣香水

禪枝啼谷鳥忍草護松關偶入樵人逕桃花又一山

夾山寺

石壘久已徙青山仍舊名去都無一舍已覺旅塵清
壘山

獲鹿道中望抱犢山

王士祿

茫茫懷古心悠悠鹿泉路不逢抱犢人
張望青山暮
藺相如回車處
竇克勤

能叱秦王暴方回趙相車若非操勝算社稷懼邱墟
一避國威壯將軍亦負荆強鄰雖虎視不敢數加兵
詩
七言絕句

唐

咏高漸離詩

李白

燕南壯士吳門豪
筑中置鉛魚隱刀
感君恩重許君命
泰山一擲輕鴻毛

易水詩

馬戴

荆軻西去不復返
易水東流無盡期
落日蕭條薊城北
黃沙白草任風吹

送客還幽州

李益

悵悵秦城送獨歸
薊門雲樹遠依依
秋來莫射南來鴈
縱遣乘春更北飛

滹沱見蕃使

李益

漠南春色到滹沱
邊柳青青塞馬多
萬里江山今不閉
漢家頻許郅支和

易水

胡曾

一旦秦王馬角生
燕丹曾此別荆卿
行人欲識無窮恨
聽取東流易水聲

渡滹沱河

胡曾

光武經營業未興王郎兵革暫憑陵
須知後漢功臣力不及滹沱一片冰

過邯鄲

胡曾

曉入邯鄲十里春東風吹下玉樓塵
青娥莫怪頻含笑記得當年失步人

渡桑乾

賈島

客舍并州已十霜歸心日夜憶咸陽
無端又渡桑乾

水却望并州是故鄉

邊庭怨

盧弼

春衣昨夜到榆關故國煙花想已殘
小婦不知歸未得朝朝應上望夫山

盧龍塞外草初肥燕乳平蕪曉不飛
鄉國近來音信斷至今猶自著寒衣

泊花石浦

劉言史

舊業聚臺廢苑東幾年為梗復為蓬
杜鵑啼斷回家

夢半在邯鄲驛樹中

經賈島墓

鄭谷

水繞荒村縣路斜耕人訝我久咨嗟重來兼恐無尋

處落日風吹鼓子花

宋

瓦橋關

歐陽修

古關衰柳聚寒鴉駐馬城邊日影斜猶去西樓二千

里行人到此莫思家

過白河澗

蘓轍

亂山環合疑無路
小徑縈迴長傍溪
髣髴夢中尋蜀
道興州東谷鳳州西

還雄州

沈文通

濟濟新聲出禁濱
邊城一聽醉千觴
明朝便是南歸客
已覺身依日月傍

使遼至雄關

彭汝助

馬頭今日過中都
到得雄州更有書
道路莫嗔音問

少天寒沙漠鴈來疏

邯鄲道

范成大

薄曉霜侵使者車邯鄲阪峻且徐驅困來也作黃梁
夢不夢封侯夢石湖

邢臺驛

范成大

太行東麓照邢州萬疊煙螺紫翠浮誰解登臨管風
物枯荷老柳替人愁

內丘梨園

范成大

汗後鵝梨爽似冰
花身耐久老猶榮
園翁指似還三嘆
曾共翁身見太平

趙州石橋

范成大

石色如霜鐵色新
洙河南北尚通津
不因再度皇華使
誰洗奚車塞馬塵

東坡祠堂

范成大

化原坊裏尚黌堂
聞道蘓仙有奉嘗
想見當年行樂處
牙旗鐵馬照金章

望都

范成大

荒寺疏鐘解客鞍，由山東畔白煙寒。
望都風土連唐縣，翁媪排門帶瘿看。

范陽驛

范成大

郵亭偃仄但宜冬，恰似披裘坐土空。
枕上驚回丹閣夢，屋頭白塔滿鈴風。

琉璃河

范成大

煙林葱蒨帶回塘，橋影驚人失睡鄉。
健起褰帷揩病

眼琉璃河上看鴛鴦

灰洞

范成大

塞北風沙漲帽檐路經灰洞十分添
據鞍莫問塵多少馬耳冥濛不見尖

良鄉

范成大

新寒凍指似排簰村酒雖酸未可嫌
紫爛山梨紅皴棗總輸易栗十分甜

過河間夜宿家則翁三絕

文天祥

空有丹心貫碧霄
泮冰亡國不崇朝
小臣萬死無遺嘅
曾見天心十八朝

南歸鴈蕩報郎君
老子精神健十分
不為瀛州復相見
阿戎翻隔萬山雲

江南車蓋走燕山
老子傍觀袖手閒
見說新詩題甲子
桃源元只在人間

滹沱河

文天祥

過了長江與大河
橫流數仞絕滹沱
蕭王麥飯曾倉

卒回首中天感慨多

金

盧溝

趙秉文

河分橋柱如瓜蔓路入都門似犬牙
落日盧溝溝上柳送人幾度出京華

鷄鳴山

趙秉文

煙蒸山腹晴猶濕河帶冰漸暖漸流獨立鷄鳴看日出
五雲多處是皇州

元

咏白溝河

郝經

易水南邊是白溝
北人為界海東頭
石郎作帝從珂敗
便割燕雲十六州

挹陽山

郝經

孱顏蒼玉挹幽村
突兀雙龍窟宅尊
回首萬山東盡處
冷煙平遠半乾坤

沙丘臺

王惲

一從奇貨落韋機秦自莊襄統已非大寶前依王命
論牛當馬後一何為

高壁投來識已真沙丘臺下泣宮臣事機說到還元
處造物於中太戲人

王河

馬祖常

御溝春水曉潺湲直似長虹曲似環流入宮牆纔照
尺便分天上與人間

李陵臺

許有壬

李陵臺下駐分臺紅藥金蓮徧地開斜日一鞭三十
里北山飛雨逐人來

故縣道中

安熙

塵事年來亦屢更此身與世淡無情敝裘羸馬嘉陽
道只有雲山管送迎

過獻王墓

薩都拉

西風老樹昏鴉集日落荒城暮雨崩寂寞斷碑秋草
裏行人遙指獻王陵

宿長蘆

薩都拉

柳花漠漠春歸寺
柳色青青晚渡江
屋角松聲撼風雨
道人一夜不開窗

代王城金波泉

李光溥

一脈金波喚作泉
孤城小小帶疏煙
從容三讓登車後
黼黻炎劉四百年

早發滹沱感冰合

陳孚

征鼓連天戰血紅
存亡只寄寸冰中
憑誰剪取麒麟

碧畫作雲臺第一功

呂公祠

陳孚

山形夭矯蒼精劍日氣瞳矇紫磨丹度盡世人人不
識青烟起處是邯鄲

明

薊門聞笛

林榮

冒寒重到塞垣游鐵笛依依起戍樓應有盛唐遺譜
在月中三唱小梁州

項節婦

林榮

一生孤苦分宜堪鄰女相憐不整簪向使此身江北
老祇應揮淚想江南

杏花臺

王璜

二月南郊載酒頻古臺寂寞杏花春林間黃鳥休窺
客不是當年舊主人

老去光陰落日斜春風扶屨意長嗟祇應有恨憐芳
草總是無緣看杏花

夏日出文明門

薛瑄

文明門外柳陰陰
百轉黃鸝送好音
行過御溝回望處
鳳凰樓閣五雲深

古北口

倪敬

虎豹森嚴雉堞牢
亂山如戟入雲高
驅車直上西岡頂
沙漠依稀見白旄

修滹沱河有感

尹耕

高築長隄深濬河
黃埃赤日奈如何
休將汗滴滹沱

水滴入滹沱水更多

塞上曲送王元美

李攀龍

燕山寒影落高秋
北折榆關大海流
馬上白雲隨漢使
不知何處不堪愁

易水詩

傅珪

荒邨野寺古今秋
白澗西來易水流
徵羽聲中悲士怒
不知別後幾同讐言

易水詩

馮惟敏

水聲山色自前朝西望彊秦萬里遙一自荆卿從此
去秋風千載尚蕭蕭

居庸關

皇甫汈

山城落日照居庸抗嶺迴巒紫翠重十月邊陲塵不
起萬年陵寢霧常封

盧龍署中有寄

王世貞

山城小雨鷓鴣啼楊柳辭寒綠正齊我夢春閨獨不
見怕乘雲雨過遼西

昌黎石門

杜謙

鰲駕山來碣石間
兩厓雄峙作重關
池橋水自龍津出
仙館人從鳥道還

譜孤竹舊事感悼

王仲默

劍解雙龍記玉樓繁華如夢水東流
年來鶴返家山路
禿柳殘松共語愁

本朝

保定閱兵

果親王

忠愛心餘纘武功私縱獻耕有遺風旬宣

帝命教冬閱攘臂爭開霹靂弓

又

凋弢月偃戟霜銛駟介庶庶整暇傳旄羽繽紛金鼓
肅靜如山岳動如川

侍從登景山

張英

追隨登陟翠微峯馬首雲生石上松俯視萬家圖畫
裏祇因身得近

飛龍

唐槐

李基和

記得開元寺裏松半隨濃艷謝春風
白頭誰復譚天寶烽火漁陽剩此翁

盧溝張華舊居

田雯

水志山經入洛餘黃埃一路撲金車
橋邊先到張華宅借讀姬嬛數卷書

樓桑村酈道元故里

田雯

螺髻煙垂獨鹿青
酈生宅畔月泠泠
燈紅一寸樓桑夜
還註桑欽舊水經

定州懷古三首

王士禎

公子曾聞雅善詩
倉唐一對使人悲
翻憐往日申生死
不鮮晨風與黍離

一代詩家劉夢得
元和標格冠當時
欲尋陋室知何處
斜日空城徧兔葵

三守江湖髻欲星
太行了了送餘青
崎嶇海外歸來

晚無復絲絢侍禁庭

七夕宿獲鹿縣話別感成

王士禎

無數青山繞縣門
秋河斜處已黃昏
來朝又向并州路
雙淚憑君寄故園

雄縣道中雪

王士禎

關河暝色冷征裘
往事公孫戰伐秋
趙北燕南盡煙水
茫茫風雪易京樓

賈島峪

姜宸英

荒墳無路草芊芊
高塚何人亦道邊
占得千秋五字
在休將窮薄笑前賢

安肅道中

竇克勤

舉頭紅日耐深寒
忘却悠悠行路難
南去逢人聊一
問高堂可許寄平安

琉璃河

顧嗣立

日欲沉如赤玉盤
燕脂迸破暮天寬
愛他六里河中
浪却少鴛鴦對對看

涿州

蔣廷錫

遠樹微茫綴碧空
范陽驛畔塔鈴風
驚回驢背江南夢
恍似金山落照中

白溝河

蔣廷錫

安肅軍邊策馬過
涓流如帶不爭多
兩河已付耿南仲
却要區區巨馬河

詩六言

北周

高句麗

王 褒

蕭蕭易水生波燕趙佳人自多傾
盆覆盃淮淮垂手奮袖婆娑不惜
黃金散盡只畏白日蹉跎
元

定州禪寺

李光溥

幽鳥避人飛去好風戀竹頻來為
愛僧家庭宇莫教
踏破蒼苔

畫棟朱簾雲雨玉簫金粉霓裳千
古太平朝野一聲

烽火漁陽

再見封侯萬戶立談白壁一雙詎羨耦耕南畝何如
高卧東窗

前山後山紅葉東溪西溪黃花紅葉黃花缺處竹籬
茅舍人家

本朝

過毛遂故里

申重熙

驅馬經過趙地臨風感嘆毛生自薦雖能脫穎猶然

策士縱橫

易水

申重熙

易水寒風終古衣冠客去無還昨日畫圖披覽督亢
依然在燕



畿輔通志卷一百二十